

- J W É B A N O U -

*Jwé... Wi jwé mizisyen
Kontinié fè nou tann léko bel pawol-la
Mélanjé lé son, lé zarmoni ,
Fè nou touché di bout dwèt lavi éternel.*

*Jwé ... Jwé ba nou mizisyen,
Pou tjè-nou tout an menm tan
Bat an bel tanbou-bèlè lanmou.
Ba nou an chopin plézi
Lè ou rakonté nou manniè lavi pé bel*

*Jwé... Jwé ba nou mizisyen,
Ou la pou endé nou travèsé lavi-a
Asiz anlè do konésans é sajès
Néwayé, dénonné zòdi ka polié tjè tout nonm*

*Sé limiè pou nou...
Ti gou sik dan fontenn lavi...
Jwé ba nou...*

*Pou di tout nonm fèt pou lapé
É pa ni mervey asou latè
Si sé pou an sèl gout dlo paret
An zyé an ti manmay.*

*Mizisyen sé chantéw ki pé
Ésèyé fè tout nomm, tout fanm ki ka tann li
Konnet an leksplizion lanmou
An débòdman bonnè pou nou arété tounen fol.*

*Jwé mizik-ou pi fò, mizisien, jwé
Chanté-w ba nou sé pawol la vérité.
(Pou kléré sa ki an fon nam-nou
Kon lanbasadè sa ki envizib pou nou)
...Sa ki lenvizib pou nou*

*Jwé mizik-ou pi fò, mizisien, jwé
Chanté-w pou nou sé chanté la libète.
(Limen difé ki an ba sann zié-nou
Révélé sa ki bel, menm dan larpej silans-ou)
...Menm dan larpej silans-ou*

Jwé mizik-ou pi fò, mizisien, jwé'y (X 2)

*Jwé mizik-ou pi fò, mizisien, jwé
Chanté-w ba nou sé pawol la vérité.
(Lè piès mo pé pa esprimé sa ki an fon tjè-nou
Sé an langaj iniversel pou...)
...Tousa ki enpòtan ba nou*